

四庫全書

經部

欽定四庫全書

周易象辭卷十二

餘姚黃宗炎撰



山下
水上 蹇

古今禍難之興无不始於乖離天地和洽則雨暘時
若天地乖離則五行失叙人情和洽則元首股肱明
良喜起人情乖離則君臣父子唯億萬心妖孽生於
幽隱舛逆在於跬步凡一動一靜莫非艱難危險之

事此睽之所以必至于蹇也夫五官百骸之用最先在目目視既審其行乃確睽已目失其職足之步履未有不蹇者蹇蓋行而不通之謂卦以水山取象山本高峻拔出於地上水本潤下由行乎地中今水反加諸山上其倒置已極將使盪滅彝倫陷溺人心者無所不至矣推原其故北方之水性欲東注有山以塞其東北使其不得放歸東回流激湍遂成懷山襄陵之勢禦災捍患唯有因勢利導行所無事水必就

下有來无往盡息壤以障洪水无驅其復往之術䟽
淪決排亦唯受其來而縱之斯无事也斯利也水山
皆東北之卦濟險之人與濟險之道必身立乎險外
始可有為彖詞所以云利西南不利東北蹇有用足
跋涉之義故六爻多言往來初居最卑地下之地汎
濫之所究竟如人雖微賤未有救時之責而人望已
歸譽之象也二居地上下民昏墊為王臣者蹇蹇獨
勞也三在山巔水不能久留反而趨下復其常也四

為水體水來聚會无不連合也五以天下為蹇其蹇
乃大一人憂之羣臣協力為朋來之象也上處最高
水不能及卦終險夷水亦治平山仍巍然而碩大也
即水落石出之意 蒙山下出泉其水乃山之生氣
所成孩提親愛可達天下唯果之育之至壯老而不
失斯為大人矣蹇之山上有水其水乃汙合亂流化
為狂濤反覆桎亡迷其本性唯反其既往之犇放修
其敗壞之習染斯為補過矣

蹇利西南不利東北利見大人貞吉

水險山止有危難而行不進此蹇之象蹇之義也夫
流行不息者水阻礙不遷者山山雖塞水之去路水
必潰決以就其所歸西南為地平夷廣衍可溝可瀆
漸趨于海東北為山綿互澀滯水不可通則將益其
汎濫故利西南而不利東北也然濟時救世豈庸衆
可能必利見有德有位之大人艱難守正獲治之吉
道也

屬蹇跛也從寒

蹇

從足道路有窒塞足行不能如意

若跛者之不正水流而山塞之亦猶是也小篆譌作
囙從寒省義雖可通而解多支離矣

彖曰蹇難也險在前也見險而能止知矣哉蹇利西南
往得中也不利東北其道窮也利見大人往有功也當
位貞吉以正邦也蹇之時用大矣哉

蹇者行逢閉塞動皆窒礙人生之患難也有險在前
未可身試見而能止待時而行知彼知此其智已哉

山靜水明所以成其為智也蹇之利西南者九五一
陽往居平夷之地而得中也坎水一奇行于二偶之
中是水由地中行也不利東北者水過山而無可流
其道路已窮極也水拂其潤下之性則發為狂濤川
瀆不足以隄防而蹇終不可濟也利見大人者謂有
其德則知天時地理而舉錯得宜有其位而經營度
量天下之人民信從往而有為何功之不成也陽剛
中正之君而當位獲吉乃其正邦國之明效也古今

之運會一治一亂因時而致用使亂者復還于治是
蹇之所係者大矣哉

象曰山上有水蹇君子以反身修德

山高水深水行山峙山實水所發源者也逆而駕乎
其上天時人事未可力爭故其象為蹇君子知橫逆
之在於世者悖上下之常道變萬物之恒性多有出
于情理之外既不得論是非亦无可興怨尤唯當屈
其前進之氣自反于身修其德所未備而已豈能與

氣運相校乎 待時非空空坐守以待時世之自平
必反身修德增益其所不能始可以有利用

初六往蹇來譽

蹇難之初往而嘗試是為禍始也退而潛隱于下其
身志不染於降辱彼有心世道之人咸欲物色之以
為他時濟時之用雖處下位已為人望之所歸而名
譽日章矣唯不求譽故聲聞莫得而揜苟踳進以圖
僥倖所遇唯蹇名實兩喪矣君子貴知時也

象曰往蹇來譽宜待也

雖物望歸已而虛名易於賈禍尚宜待時而動聖人
恐人誤以虛名之及易于任事又申其義

猶待俟也從之從寺寺有拘守之義凡行欲遠去拘
守不進將有俟待而然

六二王臣蹇蹇匪躬之故

以身許國為王之臣天下之蹇皆王所拯救而王之
蹇又其臣當代理故曰蹇蹇既任天下之重已溺已

饑雖獨切于我凡其經綸勞瘁俱非因吾躬頂踵之
故而自為謀也五剛中濟世之王者與二柔中順承
之臣子相應王則知人信任之專臣則忘身報會之
至

故故使為之也從之從古古人立法後人但當奉行
亦有因久而敝生者則不可不議變革之道在人執
策而損益之使所為者通今而仍不背于古也以其
有酌古之義借為典故以其有長久之義又借為故

舊以其有更改之義又借事故物故戴侗氏杜譔作
從久久即古也意則重複義則䟽淺矣

象曰王臣蹇蹇終无尤也

以天下為己任雖極其胼手胝足不敢自以為賢勞
而有所怨尤也

九三往蹇來反

陽剛居上下之介有濟世之才者滔滔天下以一人
砥其橫流總未可犯難而即行然反求諸身斯世之

安危治亂无不並陳于胸臆可為王者師矣反與反
身修德同處蹇難而協力輔嗣所謂同濟也然其
才能必屬諸陽剛而為上下之所賴

象曰往蹇來反內喜之也

反身修德雖未即施於天下而內行純脩家庭鄉黨
固以喜之矣君子反身而誠樂以忘憂其內亦未嘗
不喜也使其少年逢世豈能若是

六四往蹇來連

離下而上蹇難當除之時居得為之地亦除去蹇難之人也然濟世須陽剛之才四上承九五下鄰九三連而合之何功之不成苟獨擅自專豈能出險人技若己人聖心好即此之謂

蹇連負連也從從從車人所負荷之囊索累累聯貫步行如車載也今與聯通用負連之釋隱矣

象曰往蹇來連當位實也

四陰當位而虛唯虛故能從人三陽當位而實唯實

故能有所旋轉負連以實物當位以實人

九五大蹇朋來

人君憂時恤民必非一手一足所能匡救唯有知人
善任天下之大蹇使百執事散而理之一人舉一事
一事有專長朋來會合而分其憂勞雖有大難无不
克濟天降災禍于一世必生救災定禍之人於此時
但有知與不知用與不用爾能知能用災禍隨消不
知不用賢人君子老死饑寒災禍蔓延流毒數世至

天怒自息而後其亂漸平此權實操于人君彼人君者亦何樂乎災禍何譬乎治安而必欲助天為虐也蓋亦三復於大蹇朋來之辭象乎

象曰大蹇朋來以中節也

節如節制之節大化之鑪錫悉屬于人君之鼓鑄収天下之寸長則人无不可用唯患舉錯有私則賢能日遠以中為節其大智也與何畏乎大蹇

上六往蹇來碩吉利見大人

碩與碩果之碩同山之象也剥之碩在上故云碩果
言其高也蹇之碩在三故云來碩言來而向下也九
三以剛正之德屹然中流挽舉世之狂瀾內外咸賴
以濟蹇上獨與之相應舍此更復何圖所以往則蹇
未可出來則得碩可倚同心併力患難可平蹇至于
此方能獲吉然其權其勢自操于居天位之大人九
五剛中饑渴求賢以致朋來之慶上之利見天下皆
雲合而影從矣

象曰往蹇來碩志在内也利見大人以從貴也

有其才而无其位與有其位而无其才功俱未可成也來碩則志在内卦之九三見大人則從九五之貴以大為之君用能勝任之臣撥亂反正斯其時哉



水下
雷上
解

皇天降亂民生塗炭天地好生之心或幾乎息矣及乎厭亂悔禍始有聖賢出而任事驅除斯世之患其經緯措置雖非朝夕可定而天時人事實有條然丕

變者蹇難之後所以繼之解散也天地之氣閉藏沉
錮萬物摧殘陽明剛正之道漸萌蘖于幾微其醞釀
既久雷振起而破其陰翳雨和暢而潤夫枯槁天下
鬱勃不申俱自此而發舒向也聾瞶之耳目亦盡洗
滌更新矣更新則必有恩膏之及下能散其可散者
而後天下歸之唯務于寬大而不可有係戀覆載雖
廣无所棄取寬大也執守雖固多所遺失係戀也寬
大之至以舍為獲如田如射舍其矢以獲狐與隼狐

性埋伏隼性飄揚能舍則極高極下无不致諸羅网
係戀之至雖以乘車之貴猶不忍暫離其囊橐自謂
執守之固也不知思奪其負者即在其旁矣若夫為
相之道无不相從為君之道其所以維持固結天下
者止有解散之一途内而推誠布公舍已從人外而
捐租除賦藏諸民間雖草野小人亦皆精誠貫徹矣
解非緩散而无拘之謂乃散一己之私而作興天下
之謂也雷雨未作萬物雖各含其發生之幾尚有所

蒙蔽而不能透達雷雨一作萬物之生氣隨其鼓動而盡出資其潤澤而流行者皆天地解散夫太和既无吝嗇亦无私授也 屯之雷未發雨未降在人君為膏澤不施人民之瞻望將移于侯國解之雷已發而上雨已降而下人民共沾其膏澤所以象為君子有解而孚信洽于小人也

解利西南无所往其來復吉有攸往夙吉

雷發聲而春雨至頑凍沉寒悉從此而開釋解之象

也雷居正東水居正北是解者先在東北天地之氣
化王者之政治豈可有所偏私令方隅之隔絕乎故
利及夫西南使四海同仁也夫水本潤下在蹇之逆
行豈能長久勢必无所往其來復歸于下得水之正
道而吉也今與雷相遇變為時雨將有所往以益萬
物人民望之唯恐其至之不夙則又以早為吉也蒼
生饑溺聖人憂勞以拯其患難患難既平聖人急為
長養之意若此 分明无所往有攸往兩語截然對

係以兩吉字順理成章先儒苦苦牽強毫無意義吾不知之矣

解解判也從刀從牛從角畜之皮紉骨堅者莫如牛且又巨而多力最為難判其強在角屠者避其角而奏刀可以披卻導窾无全牛矣所謂迎刃而解者是也此即理此即義也天下事物雜亂患難乘人亦必有所當避有所當披導者雷雨之解天為之患難之解人為之天為者義理出于自然人為者須尋繹其

義理而後合于自然也以其有散釋之義故為解事
講解以其有離去之義又借為發遣之用禮夙早敬
也從夕從廴持事之意人之莫氣昏愼无取凡言夕
者多為明日有事而預戒其期于今日也古文作𠂔
𠂔從人從頁百舌之貌也取言語預為告戒之意

彖曰解險以動動而免乎險解解利西南往得衆也其
來復吉乃得中也攸往夙吉往有功也天地解而雷
雨作雷雨作而百果草木皆甲拆解之時大矣哉

卦何以為解水性險而雷性動動則能達乎其外而免此在身之險故曰解也解則宜廣博不宜偏私自近及遠直至於西南天下之民歸之一往而得衆庶之多也向水在上今來復于下而二得中乃水之正道也除患難施恩澤當速而不當緩故以夙往為有功也自冬徂春天地之氣陰慘者日就于發舒雷以下升至天雨以上降及地一時並作百果草木之萌芽苞孕于莖甲者皆拆裂而透出豈有所勉強造作

而然乎皆因時至而自解也故禍亂方興智无可施
其謀勇無可施其力雖聖賢亦不能與天爭也迨夫
時既至矣雖庸夫豎子皆可起而乘其勢蹇之解時
為之也夫子特贊其大言時而不言用屬之天者多
爾蹇言時用者不欲以咎歸天欲人自盡其事也解
拆說文闕裂也從手從斥江斥將崩其土先裂人之
以手拆物碎裂亦如之

象曰雷雨作解君子以赦過宥罪

陰寒凝錮萬物枯槁雷自地起陽氣隨之直達于上
雨自天降和藹滋潤之脉流通于下前此之慘惻盡
消釋矣雷雨作而象解也君子憫生民之凋敝陷于
過罪寔上失其道使天下昏迷而至是天地好生之
德无乎不在偶因雷雨而流露為民父母以天地之
心為心哀矜其既往赦之宥之咸與維新使各遂夫
生生而已

赦赦置也從支從赤人所犯者乃薄罰以置之使悔

改也謂小撻之使其皮赤而已或從亦作赦謂既小
擊之復扶掖之也夙宥寬也從宥從有君子不忍以
法加人尋其有可寬之路使復還其家也豐辜犯法
也從自從辛辛屬金秋官肅殺為刑獄聖王仁愛之
至凡于刑獄必推其所自以求其隱情未敢即繩以
法也秦人以其上類皇下侶帝借魚網之罪罪為簿
書之用是網民也仁愛之心安在

初六无咎

難之初解人人喜補過之有地此非人力乃天時也
故直云无咎

象曰剛柔之際義无咎也

陰陽交暢雷雨法施初比應四皆剛爻也剛柔際會
不吐不如人與天合義當无咎

九二田獲三狐得黃矢貞吉

雷雨既作農事伊始二當地上稼穡之所也故田以
除其害苗者獸三為羣三狐謂狐多成羣雖當春首

不得不田田而能悉獲者以其得黃矢而為躬之用也剛中之臣應柔中之君有賜履專征彤弓彤矢之象故貞而吉

狐蒙解見未濟彖辭

象曰九二貞吉得中道也

九二之所以貞吉者自上卦而復下卦又得中道故也中道而行何邪媚之不解

六三負且乘致寇至貞吝

人難聚而易散其最足以離散人心者莫如聚貨財
貨財聚而劫奪興禮傳所謂財聚民散悖入悖出者
也位處下卦之上乃有國有家之人固守其畜積之
物不忍頃刻離身即在輿也猶然負之而且乘焉其
為鄙賤之狀至于若是彼必自恃其守護之慎密无
間可以竊發豈知寇盜旁觀適足以動其非分之思
實在上之貪鄙教之使然也不能解天地之恩膏而
必欲私于一身者類如此豈不足為羞恥乎

象曰負且乘亦可醜也自我致戎又誰咎也

夫以乘輿之貴而自負其財物彼方自為得志其狀
貌之猥瑣鄙陋即此亦可醜矣人徒知劫奪之禍成
于寇盜而其所以啟之者實自我致其兵戎爾乃專
歸咎于寇盜又誰信之

九四解而拇朋至斯孚

一官之守一事之任必欲有所執持以自盡其所長
惟居具瞻之位者不欲其守一己之見違拂于衆人

四奮起之雷激昂決斷天下憚之唯其至公无技能
之可試无意必固我之可私解其一手所握固之力
則凡為我之同類者俱進而孚誠自不可散矣彼善
皆我善彼功彼能皆我功能也三身負而寇至四解
拇而朋至解負與解拇孰難寇至與朋至孰樂為民
上者蓋亦審諸按拇將指也人之握物大指不力
則不固咸之拇因在下而借為足指今反因借而附
會以從之非也涉險以足解難以手手援天下豈理

也哉硜硜執持此匹夫細行非大臣事也

象曰解而拇未當位也

固執自守非當位者之事

六五君子維有解吉有孚于小人

雷雨既解散其膏澤于天下使天下之飛潛動植各
自因其靈蠢而發舒其性情君子雖為聰明睿知之
聖未嘗自任其耳目心思善與人同用中于民其所
以維係天下牢固而不可拔者止有解之一道更无

他術能解則吉也其誠其信感格于愚夫愚婦天地
同流有孚于小人君民始固結而不可散矣 四解
拇大臣无技之象朋至同寅協恭之象五有解舍已
從人之象孚小人於變時雍之象君相皆解德與效
各肖其職

象曰君子有解小人退也

君子不能解小人之攘奪斯起君子有解小人无不
退而聽命苟子不欲雖賞不竊也 先儒以扶陽抑

陰進君子退小人為讀易綱領橫據于胸中處處屈經傳以申此說矯強雜揉意旨索然如曰有孚信于小人之退天下有此駸笨句法否君子小人大約以位言之時居多自生嫌疑自開戰爭非天地度量聖賢之胸次也

上六公用射隼

句

于高墉之上獲之

句无不利

隼句獲之句

鷹隼霜後始擊雷雨既作非其時矣但恣夫貪戾之性忘其羽重風回不可以高飛且不藏身林木顯然

特立于高墉之上唯知貪食而害物戀戀不能自解
公惡其凭陵觀望用弓矢以射隨即獲之彼將何所
逃罪哉罪人斯得何不利之有人負物不解隼見
物不解俱患得患失之心使然也雖有人鳥之異而
其見利忘害不異也負物者物為盜奪見物者身為
人獲即莊生栗林之喻君子視富貴如浮雲佛氏重
解脫正是此意 往古來今成毀相因无不解散之
物田獲狐墉獲隼我不能解彼為解人失人得或解

或聚一聽諸時而已君子不可以不知時

𦏧𦏧弓弩發于身而中于遠也從矢從身或從寸作
𦏧射謂中的須有法度也此皆會意不取象形或作
𦏧則稍兼象形矣隼隼從佳從一鷙鳥也鷙鳥不雙
棲一擊必中故從一說文謂即鷗字屬鳥部注曰祝
鳩也意隼即隼之省體復贅鳥以混于翩翩之鶴斯
成俗書矣愚按鷹之為文有佳鳥並著者今隼亦有
佳鳥並見之文豈指雍隼能擒搏衆鳥之事與

象曰公用射隼以解悖也

時當解散不宜有所係戀隼貪物而不能捨是悖道悖時之甚者公從而解之

悖悖亂也從心從孛孛乃草木生長有襍亂之義心不專一意識種種萌動自不順序矣本從言作諱諱謂言易出則多亂也籀文從兩或作𢇛疑而不定兩相違背也古文作𢇛𢇛從子從出為子而出其背畔父母可知尤覺簡當明切

蹇之患難佞成于天者君子不敢怨尤但反身修德
以安義命盡其補救之道皆歸功于人解之動而出
險君子不敢貪天功以為己力乃赦過宥罪而薄責
于人患難未嘗推委安寧急欲解散足為縮手患難
攘臂功名者之戒蹇之時人君亦在患難中主雖英
武又必欲才能之臣為佐朋來先在于五五始得人
而用解之時人君虛已施其恩澤于天下小人无不
歡欣鼓舞須輔弼无私膂力股肱輻湊而進朋至先

孚于四四可同寅和衷苟蹇之朋不來于五天子未
可云知人解之朋不至于四帝王未可為大度蹇難
與解散異也



澤下
山上 損

險難既解人情懈怠其趨事赴功俱緩而不亟緩則
所失者多矣故損繼解雷風為天地之長男長女稟
天地之氣最盛山澤為天地之少男少女稟天地之
質最巨萬物之賦受无不氣先而質後者山本居高

澤本居卑其形質固然惟澤之氣能上通乎山之氣能下貫乎澤則山常潤而澤常積草木藉以培養而發生有交相感應之義其卦為咸今山之高者自高澤之卑者自卑雨露之所濡溼俱流而就下其所承受者不能展輸上達則山將枯槁而不榮澤惟一往而不返其為焦土為淤濁俱无生生之機所以謂之損也少男少女血氣未定共居一室其嗜欲亦足以損人凡天下祿位名壽動人欣慕者无不可損我

者也則其損為虧損為傷損皆為惡德加以減省為義用廉草貪用靜勝躁用簡御繁是為道日損損之又損以至于无為損聲色則耳目聰明損馳逐則百骸和調損罔念則心思睿智百姓所說我躬獨止血氣所說天君獨止寧處不足毋處有餘寧安卑下毋安崇高則其為損也虧損傷損何得而入哉夫惟能自損故不受人之損此以人事而合天者也天者何時而已矣時者理勢之自然天地鬼神所不能違大傳

謂盛衰之始盛衰即盈虛也虛者衰之終損之至盛之始也盈者盛之終益之至衰之始也盛衰相倚如循環必視盈虛而遞轉能損則虛恒虛則不終于衰日中月望君子不由也卦以損下益上為義國以民為本高以卑為基損下益上固非美事所以明損然下說則民力所堪上止則不盡民之力雖損而不為害下三爻本三損九三變六三以益上上三爻本三益上六變上九以損下三陽並列其勢至盈故招損

三陰並陳其形甚虛故受益初雖陽爻陽位以其處卑僅可斟酌而量損二陽爻陰位又復得中未可云盈也故无損无益四陰爻陰位宜得益者然邀福不如損疾損疾乃益之大者也五陰爻陽位有受有辭有取有與故民不病而益无窮也上居損之極其受益宜大得臣之益校他貨賄不同又在元龜大寶之上者能知損益之時而富貴可長保矣

損有孚元吉无咎可貞利有攸往曷之用二簋可用亨

澤為貞卦山為剝卦移三之一陽于上若減此而增彼故謂之損也大約人情與而增之則喜取而減之則怨有損于民而能使之急公緩私共信其非厲己是君民一體吉孰有大于此者乎豈尚有聚斂之咎乎可固守以為賦稅之正道而不變微獨賦稅凡有所往而事事俱无不利者也當念民人疾痛稼穡艱難豈惟自奉之減省節儉且何往而可奢用哉莫大于事神禮賓矣誠敬有餘奚懼儀文之不足雖損至

二簋亦成亨也老子治人事天莫如嗇正有得于此
損損減也從手從員員者物之記數也手持其多寡
之數而校量之必有所失墜矣失墜則有所毀壞而
減少矣嗇嗇何也從曰從囟囟有求之義言語未定
而尋求其理于何在也

彖曰損損下益上其道上行損而有孚元吉无咎可貞
利有攸往曷之用二簋可用享二簋應有時損剛益柔
有時損益盈虛與時偕行

卦之所以取義于損者以其損下而益上也我失人
得人失我得天地總此物力豈能民顛顛而君獨侈
怙邪則其減縮省約之道必當上行自為君者始君
自損而有孚誠即得元吉无咎且可貞利有攸往矣
曷往而散用其損下之物雖二簋可用享蓋享禮至
盛宜脩物豐腴今僅以二簋從事者實應乎時爾非
謂二簋可世法也特有時宜若是也非謂凡剛必損
凡柔必益惟剛處有餘柔處不足以有餘補不足亦

有時而然也。盈者損之，虛者益之。既損則盈者就虛，將復得益；既益則虛者就盈，將復見損。但覺日月寒暑之推移，而人事盛衰亦因斯以修改損益。盈虛原无定著，直與時而偕行邁者也。君子乘時則不受天損，知時則不欲受人益矣。

象曰：山下有澤，損君子以懲忿窒欲。

山澤質殊而氣通，山下有澤則高下下不相貫濡，削基以豐顛之象，損之義也。君子思象與義，知惡德。

當損者莫先于忿欲而惡德之損人者亦莫甚于忿
欲夫忿者強梁之氣即死氣也物之生者无不柔弱
死則化為剛強古之用兵猶然善戰不怒勝戰不爭
而況于居身乎是不可以不懲稍有發端即加遏滅
勿使其形現也欲乃愛戀之私最足以愚人之智故
求生之厚者必至于輕死古之至人不見可欲其心
不亂雖有器物无所用雖有舟車无所乘何至汨沒
其性情而不覺故萌芽初動即杜絕其源而勿使之

流則惟窒塞為善也忿近乎剛隆起若山欲近乎柔
纏綿若澤

懣懣志也從心從徵有所懣驗于心即刪刈之不使
見于外也忿忿悁也從心從分忿怒一發勢如烈火
其心不能自主為氣所分矣欲貪欲也從欠從谷
人之貪侈无有程限如谷之受水不能充滿所謂豁
壑難厭者也此乃氣質使然非性情之罪俗加心作
慾失其旨矣

初九已事遄往无咎酌損之

損下益上則初在下宜損也損剛益柔則陽爻陽位
又宜損也臣民正當急公緩私之時已已私事遄往
以執公功可无觀望之咎然居下非盈澤底不竭隨
其所貯之淺深酌而損之授者不勞受者不貪適得
其時宜者也

遄遄往來數也從走從耑耑物初生之題也往來頻
數而不憚煩如草木之初生上蘖下根一時俱發兩

事皆不容暫停也酌酌盛酒行觴也從酉從勺勺乃挹酒之器如後世匏斗之類取酒于餅壘中而注之觴爵者也其容受甚寡宜計其淺深而行之于彼故借為度量之用

象曰已事遄往尚合志也

上恤民隱欲止其勞下急趨上說于從事好仁好義其志尚相合也即經始勿亟庶民子來之意

九二利貞征凶弗損益之

賦稅力役之事居下以奉上固其所當然至于懷才
抱德而居下位者豈能舍所學以從上乎利于守正
而應上之求苟與召役同征則凶矣夫待損己以益
人所損者多所益者寡此細民之職其為益上也亦
僅僅焉爾惟弗損于我致益于彼其為益始无窮盡
士君子行吾道以事君之謂

象曰九二利貞中以為志也

初與二其志不同初以從上為志二以守中為志校

諸區區益上似更大矣

六三三人行則損一人一人行則得其友

卦所以命名正在三上兩爻陰陽迭換變天地之體而成少男少女使純陰純陽交易其有餘不足玄黃錯雜萬物生生之本也三陽並列如三人同行紛紜各出不能相合則損去其一人以益上而此爻化為一陰如一人獨行則與上剛柔相應得其爻以比輔專心共志无所旁分朋友同心夫婦共室惟致一而

後能成功也

象曰一人行三則疑也

一人行則相得相須之友自至迨乎三則參差不齊疑貳起矣此所以多不如少益不如損也

六四損其疾使遄有喜无咎

以上下剛柔之道律之于斯時也四宜受益苟非止體用貪得以處此日奉萬鍾之養而負疾以蒞饗焉其亦稍有所樂否則益其所未有豈若損其所本无

之善也故老子曰名與身孰親身與貨孰多世人但知名利之可榮不知名利之賊身所以增忿欲以加戚戚長憂是戕生傷性莫甚于求益而不能損也四陰交陰位虛而不盈損除其疾病使五官百骸无非天和不亦可喜乎豈有損下之咎哉

象曰損其疾亦可喜也

人之善益不如善損求樂于外不如可喜于身損疾則去我之所本无而喜即在其中天下望益者必有

損求喜者必有憂疾本我所無損之即為益非有益
于我也喜非有所喜但喜其疾之元非有喜可期也
即損是喜不必分外增加人人可得當前即是者

六五或益之十朋之龜弗克違元吉

君位宜受天下之益其所來之方與所授之人不可
一定故云或龜藏明守智默與神通可以驅大疑決
大計有國者之物十朋之龜即天子守龜尺有二寸
之類所謂昆命元龜遺我大寶龜者是也豈珠玉錦

繡其他玩好可比乎我雖不敢重煩臣民將違而不
取然人心所係誠懼是將乃莫之致而致者欲違之
而弗克此非常之吉乃元吉也彖辭元吉正属于五
則有孚不言可知 古者龜貝並用俱兩兩兼行故
謂之朋每朋以大小定其貴賤十朋之龜其大為極
一龜而直十朋者

象曰六五元吉自上祐也

夫曰或益之則不知其所自來矣人君富有四海不

藏于府庫而藏于民間下民之所喜說即為上天之
所眷注五之元吉蓋自上祐而能然 解經者多泥
于損三益上之象謂上受三之益嫌非君位推以與
五故又言或益傳言自上此以象害意也陰陽往來
豈同臣庶金帛小兒梨棗可以搬運遜讓者乎若然
是為大君而僅受此轉展之醜遺其為益幾何哉易
者變通神明之書未可拘拘論也

上九弗損益之无咎貞吉利有攸往得臣无家

損三益上以成卦則損者无容再損其受益者未可
涯際蓋以弗損為益如澤之蒸雲吐霧而輸于山山雖
受其滋潤何嘗稍減澤之涓滴乎惟居損之極雖體剛而
不為盈也不盈何咎為損之正道故吉且操此術以
往所往皆利凡彖辭之美德皆歸焉三以友上為得
友剛柔相濟有餘不足相補救也上以應三為得臣
下能事上柔能承剛有比輔之道也大約卦象以內
為家三內之二之初應五應四各有所益不與三為

伍所以謂之无家即國爾忘家之意故夫子以致一
證之 臣不必專歸天子國君亦有卿大夫大夫亦
有家臣不過因卦有上下即取臣象
象曰弗損益之大得志也

合志則志欲因人而顯中以為志則志在我而望行
大得志則凡在我所蘊蓄而期望者俱見之于事業
聲施天下矣行恭儉德謙讓治无為顧不至乎哉



雷下
風上

益

夫物損之則虛虛則有承受之地土虛為行潦勺水
歸之虛成江海為百谷王心能虛義理无不湊集位
高而虛近依遠超人民莫不以善告益孰有大于此
者乎損正所以成其益故損益相因而序也損益二
事若判然不同實一幾相貫稍有前後爾轉損體而
成益反山澤為風雷損乾下一陽以益坤下一陰之
象物以下為基國以民為本培其基固其本所以美
其辭為益世衰道微惟知惟辟玉食以四海而養一

人絕无一人憂萬方之事彖傳言至損上益下不覺
歡忻鼓舞極其贊嘆如身逢盛世其實合兩卦彖象
而並觀益之振動變更不若損之恬澹无為也家饒
則多費國富強則喜制作多學而識則恃聰明而輕
性天益止可施于民以民最下雖日有所增加終不
至夫盈滿故也雷之一陽壓于重陰未能破開錮而
自起風之一陰束于兩陽亦未能閉鬱結而自散然
其壓束之微陽纖陰必不日就于消滅將漸而增加

而奮發微陽之氣至迅厲而為雷纖陰之氣至猛烈
而為風振作鼓盪兩相宣暢陰助陽以驅陰陽助陰
以闢陽則又陰陽交益于一時者也初大作二享帝
三凶事四遷國俱勞民動衆襍然共舉不幾以益下
者困下乎五能以惠心行之皆愛民以勤民不為姑
息之政務令久安長治可法可傳非更改變易一洗
舊習之因循无能為也大綱既定宜安靜以守之永
為恒憲苟于此復求益焉則上所以招或擊也損不

終損而得益益不終益而致擊故盛衰之始君子貴知時哉

益利有攸往利涉大川

君愛其民能損己以益下民心欣喜歸向用巽入而行動作何適不從故利有所往以成事功微獨順行坦途即蹈險履危亦皆平夷而不難雖涉大川而亦利也如下四爻皆有往涉川之象惟在五之孚惠而已三代以還驅民涉川莫之敢逆豈尚存益下之心

與

益益饒也從皿從水皿所容受者少水所增加稍過則溢出益之字義亦非美辭風雷成卦无有坎兌而益文從水彖有涉川其故何也風雷交作必有雨以應之此象外之象以其非本卦之所有故僅見涓滴于器中爾 盖為非分之增水亦從卦外而至

彖曰益損上益下民說无疆自上下下其道大光利有攸往中正有慶利涉大川木道乃行益動而巽日進无

疆天施地生其益无方凡益之道與時偕行

益之取象以損上卦陽實益下卦陰虛小人力養君子其分宜然不若能反所賦稅以資于下民之感恩說服无有疆界可限也貢助徹之法既立其敝也惟知逆取于下以富上父子相離老弱填乎溝壑天下淒慘而无色澤減十一之正供散為田野之膏血自上而下及于下民天下皆春氣和藹其道盛大且赫奕有光輝也五為中正之君二為中正之臣往而任

事必不至于勞民民已蒙其福慶三與三位連正東
東南為木道兩木相合剝舟剝楫以行何大川之不
濟益所動作出以巽順日漸加進无有窮盡之處天
氣下施于地地承受之生生萬物其益豈有方所為
之究竟乎凡天地所以益物之道周旋不絕春夏固
益秋冬亦益也長養固益秋冬亦益也王者益民之
道亦與晝夜寒暑偕行而不息也 益道與時偕行
乃因時損益之意王者之政令有在昔日則利民在

今日反害民有在前日為易事在後日為艱難不酌時而行益民即所以病民也

象曰風雷益君子以見善則遷有過則改

風雷者陰陽發舒之盛氣鼓動天地之橐籥風散陰氣以及下雷舉陽氣以達上然後陰陽交得其平而為益于萬物也君子見風雷變幻不常人之德業豈可物而不化見善有可從則棄其故武急于遷徙以相就吾有過之當去則盪滌其萌芽必使更改而无

遺雷厲風行盡除其苟安畏難之積習學問進益孰踰于此

初九利用為大作元吉无咎

自上益下初最宜受益者也象雷體奮發之一陽當鼓動興起以有事益生生之氣亦經綸之樞紐也欲開闢萬世規模置諸民康物阜豈因循苟且所能辦哉其利用有為者必大有所造作如井田以養民學校以教民軍旅以衛民使後人奉為典章守而勿失

其益下也非歡虞小補之謂元吉无咎斯可矣夫卦
自損以來但知損民益君剝削餓殍寒餘之膏血聚
而斂于一庭泥沙以用之肥肉腐庖廐馬踐粟委棄
皮幣珠玉于窮年不省之區猶復鞭朴其瘡痍賣鬻
其妻子而展輸堆積新故敗壞莫為紀數上焉者有
之不足為增增之不足為樂无之不足為減減之不
足為憂下焉者稍得遲緩其湏臾則飽食煖衣父子
和順苟不顧其緩急饑莩盈野室家塗炭三代以後

之人君吾不敢求其宮室之殺于阿房建章也吾不
敢求其嬪御之僅如周禮也吾并不敢求其珍禽奇
獸弗祿食太倉也其逸豫驕侈之具俱與今同僅求
其不取无用之物終身未嘗一御耳目未嘗一接者
以寬民命有何害于崇高富貴乃數千年來竟莫或
議及也漢因乎秦唐因乎隋損下益上以井田之例
校之奚啻十取其五井田者官授民者也猶然助耕
而已謂為十一今田則民所自置者本无母錢而強

奪其子息沃壤如江浙每歲耕穫官幾十七瘠土窮鄉亦取其三之一加以雜辦差徭有盡以輸官而不足者有悉償以恒產而不足者何必旱潦為虐哉天恤遺黎生聖人居天位非大為振作安能草數千年之弊政乎利用為大作或有鑒于鹿臺鉅橋而立斯象與所以為益下之首事也

象曰元吉无咎下不厚事也

能使斯民元吉无咎誠可法可傳矣豈在下者能自

為厚生之事乎必在上者有以致之爾

六二或益之十朋之龜弗克違永貞吉王用享于帝吉
賢聖之君損上益下字內含生无不受其膏澤二特
有中正之德自與編戶不同尤為當世所注意者不
覺其大寶之駢臻矣益龜弗違與損五同辭五為君
位受益其分也直謂之元吉二位非君因時受益當
省克欲毋貪毋盈永守其正道為吉禍福之集于人
莫可測度不得不歸諸鬼神推諸天命柔順中正上

格天心王者以此承天享帝帝即錫王以百福天聰明自我民聰明天明畏自我民明畏王能益下以及民帝亦益下而享王之誠敬故吉也 或問二非君位此爻言王且云享帝又為王者之大禮何也曰人君下賢豈分財推解所可比乎將以共祿共位此賢人者固簡在帝心者也得此帝臣薦之于天而吾民受益无窮期矣

象曰或益之自外來也

益非一方不可預定自其分外來集于此

六三益之用凶事无咎有孚中行告公用圭

人君愛民與父母之保赤子同其用心所以培養護
佑之者无所不用其極益之以平日未已也益之以
嘉美之事而猶未已也恐強梁害善不可不修刑恐
虐亂治不可不講武刑三赦而不得則徹樂減膳
兵以喪禮行之皆凶事也思益下之道詳盡无虧防
患未然无可奈何而用凶事仁人君子委曲愛民之

法則也故无咎然古今損益有治法而无治人即吉
事行之久亦生弊況于兵刑之凶事乎惟在我確有
誠信愛人之心居上下之交獲上治民位乎其中而
行政損益得宜无媿立法之至意然猶不敢自專告
諸先公用圭以薦禮極其隆也 位當風雷相薄有
搏擊戰爭之象侶刑侶兵而為凶事三四俱上下之
交俱為中行周祖后稷唐虞諸侯也文王生未為天
子三四之告皆稱公倘泥于爻位之例三四象公二

在其下反象王象帝將置五于何地乎故知讀易无
例也 周禮琬圭以易行以除慝正用兵刑之微意
圭圭天子公侯伯所執之瑞玉又用以祭天祀神者
也從玉為質上象其銳首之形說文作珪從玉從圭
封會意頒諸侯之爵土即錫圭以信守之謂桓信躬
則得矣若介圭與蒲穀璧何總之廢事形之過也
象曰益用凶事固有之也

為民者必詳盡周到兵以定亂刑以懲惡原為益下

中所固有之事非過計也

六四中行告公從利用為依遷國

損之三益之四皆以身往益人者故損三象行而就
彼益四象遷徙依人夫懷益下之志位居于中以行
所事必先告我先公人神協謀龜筮允從矣如盤庚
避河太王避狄武王都鎬成王建洛皆遷國也使民
棄其鄉里遠適他邦更變煩擾民亦何以堪此然欲
為久遠之益非暫勞何能有成且民心惟我是依亦

子依其父母但知慈親之可恃并不知故土之可懷也雖遷國為非常之事而亦利用也秦不足論若漢之新豐五陵其為依安在直是流竄无辜爾豈與聞益下之道者哉

依倚也從人從衣衣附于人身動止不離最親切者也遷登也從走從卷卷本升高與登何異加走實俗人贅筆遷象鳥巢言人所託棲也上下四手兩人舉之而去為移徙意移徙必舍卑濕而就高燥故

云登云升當擇善所又從節古作 捫從手從西西
即棲也用手挽物而尋棲息之所也

象曰告公從以益志也

恐遷國病民有傷益下之志告之祖廟而從所卜可
以成其益民之素志矣

九五有孚惠心勿問元吉有孚惠我德

大作享帝凶事遷國四爻為象振動變更之日多安
靜寧謐之時少得元以養人者害人乎人君孚信協

于萬民元不知其以惠愛為心勞之乃所以益之也
勿問其他自宜元吉夫既天下信之矣豈止功業盛
大與將使黎民沐浴雍熙臻元為之至治受惠在我
之德也則化民非聲色矣

惠惠仁也從心從車車軸端也全車之運用俱管
轄于此仁愛及人者當有術以濟之使可轉動而不
窮

象曰有孚惠心勿問之矣惠我德大得志也

惠民為心可勿問其難易況又得元吉乎夫以事功為惠未可云至治漸仁摩義惠民于我德然後大得我愛民之志也聖人惟恐人君好為勲名益下之心淺厲民之政煩則殆矣特贊惠德為大得志則弼教明刑制禮作樂盡歸无為而後已

上九莫益之或擊之立心勿恒凶

益至于終則盈滿已極无有餘地復為容受彼先拒人人莫得而益之陰陽消長之數迭為升降既莫能

益必就夫損勢位隨時而去俎豆衽席悉為戈矛竟不知災害所興從何卒至言或擊美夫人而可擊之也君子持滿守盈之道惟知進退存亡寵辱不驚爾卦體躁動患得患失其立心無恒常之德此其所以凶也雷風為恒易位為益反其恒之次第是為勿恒富貴當益極无位无民有天下不與之意亡矣學問當益極自以為是拒人千里之外空空无知之意亡矣氣血當益極碩大臃腫如戚施蘧蒨聰明睿智

之靈性亡矣士君子須有終身不自足之心守為恒德高不危滿不溢舜禹未嘗自為聖湯武未嘗自為功通不變其塞樂无改其志益固未有極時也

象曰莫益之偏辭也或擊之自外來也

據益而言謂之莫益此一偏之辭耳上豈止于莫益乎且有不及防之擊自外而來未可指名者也禍福无常門乘時而至時益則不期益而益出望外時不受益雖多方脩擊而擊亦來于意外君子所以貴知

時也

徧徧頗也從人從扁扁者一戶之版圖非天下大觀有不全之義以其不全又為頗側之義

損益因乎盈虛盈虛又隨損益惟時使然書云滿招損謙受益時乃天道即此意也天地陰陽之氣其來者日進而日益其往者亦日退而日損損可保長益不可久恃故山澤之在天地間亘古不變風雷雖猛烈直湏臾已爾損言益者即損是益人心无聲色貨

利之擾智慧高朗審時不忒益不言損者勢位富厚
作為紛蹟雖有損之幾倪不自覺也損則靜益則動
也三代損益因時立法雖忠敬質文未有久而不敝
者君子救弊大約用損之事寡而用益之事多故老
子曰失道後德失德後仁失仁後義失義後禮新故
相尋益而不止天真太樸亦幾損盡而無餘苟懲忿
窒欲以為損遷善改過以為益則天弗能違時勿能
囿矣

欽定四庫全書

經部
周易象辭卷十四

詳校官鴻臚寺少卿臣梁鼎陽

通政使司副使臣莫瞻菴覆勘

總校官檢討臣何思鈞

校對官監丞臣張曾炳

謄錄貢生臣劉為幹

欽定四庫全書

周易象辭卷十三

周易下經

三

天
上
天
下

凡物有所增益必至盈滿踰乎其量則溢出而向下
舜禹授之天下不見其有舜禹江海也天下杯水也
蓬革之士天子顧問宰推轂量不能容或多至喪

餘姚黃宗炎撰

其生平蓬蓽之士坳堂杯水也顧問推轂杯為舟也
古今无分量外之功名亦无分量外之德業分量不
能容受顛蹶隨之此蓋之所以必決也此夫之所以
繼蓋也天本至高澤本最卑天反居下而澤反居上
高卑倒置勢必傾覆天之將雨大川巨浸俱蒸雲吐
霧輸于寥廓旋當沛然下降无久羈天上之理皆決
之象其畫以一陰據于五陽之上處非其位徒以非
道之說銷天下之剛直遏天下之健行未有久而不

敗者愚按卦爻象辭絕元決去小人之義先儒徒執
扶陽抑陰之例遂以剛長乃終一語為五陽決一陰
失其意矣夫陰陽之在天地何嘗瞬息相離豈有可
扶可抑但以類推陽有似君子陰有似小人據六十
四卦而論陽得位未嘗全吉陰得位亦未全凶顧其
時何如耳觀覓陸夫夫柔乘五剛及施祿居德則夫
之君位在上爻而不在五爻合觀六爻似上六一陰
昏暗貴而无位高而无民五陽无所施其匡弼各有

悽然去就之憂再繹夫之文義有以手持玦之象人
臣有罪待于境上賜之環則還賜之玦則決決去也
圍者為環周圍无虧缺者為玦有一面之不屬乾為
金為玉環之質也兌為毀折為附決決之義也反覆
詳覈情狀宛然初為小臣去就甚輕見幾而作者也
二居下卦之中自守封疆慎以觀時者也三當去就
之間裒裒瞻顧至于必不可留而後決去者也四五
與上同體為貴戚近臣无決去之道故四欲居則亂

及欲行則不忍欲諫則不聽者也五知其不可諫韜
晦自藏隨行逐隊以去者也上仁賢已盡國家顛隳
无所施其號令矣諸陽自顧之不暇何曾見其好剛
使氣恃衆而驅逐小人乎

夫揚于王庭乎號有厲告自邑不利即戎利有攸往

夫天下國家當益之後倉庫克實人才足用人君子
此往往驕奢自是不納善言惡聞諫諍位高无輔立
于其朝者小人則阿說苟容君子則道不行而求去

卦之五陽皆君子也皆有眷茲宗社出門罔罔之悲
元首股肱同為一體至于去國豈得已哉治百官察
萬民非一人任也彼二三大臣同立于王庭以對揚
休命當其孚誠相信號呼相應之時已有危厲存乎
其間安不忘危進不忘退但當告戒其私邑可為退
處之計不利于自恃无恐即兵戎以自衛則无君忌
上罪之大者唯利于負罪引慝往而不現爾或曰士
君子之仕也際世昌明則彈冠相慶見事不可為則

攜手同行瞻烏爰止將誰執其咎乎曰有比干有箕
子有微子各行其事也宮之奇百里奚固嘗效焉蓋
就去國而言无道卷懷明哲保身亦聖人所不非也
古之卿大夫俱有食邑不但於諸侯

也 卅 卅 玉珮也從丿象玦從一貫玦之索從又以手
持之也小篆因玦以玉為質加玉為偏旁而其形反
晦愚按爾雅肉倍好曰璧好倍肉曰環肉好一曰玦
大傳上古結繩後聖易以書契蓋取諸夬嘗求之而

不得其故豈古者𠄎𠄎二字相因𠄎所持者琰𠄎所
執者乃環與豈𠄎象方結之繩𠄎象已解之結與揚
揚飛舉也從手從易易性上升言飛舉者人舉手以
上物使之顯者也廕庭宮中空地在屋之前以步
立瞻望之處從广側屋從廷可安步獨立也

彖曰夬決也剛決柔也健而說決而和揚于王庭柔乘
五剛也孚號有厲其危乃光也告自邑不利即成所尚
乃窮也利有攸往剛長乃終也

夫之為義取其判決无所瞻顧而依違也剛柔相比
兩相兼濟以成用此理之常至剛柔性背莫能調濟
則剛將決絕于柔而去矣柔多沾滯剛多果敢唯剛
能決柔柔不能決剛也朝廷之上君臣揚摧綱紀是
張乃以一柔之昏暗貴極无位乘于五剛之上无可
用其弼直也雖當孚信呼號通徹之時而早知有危
厲其兢業畏懼之心乃其光明鑒燭之智也人臣當
思義乖睽禍患莫測外視宗社生靈內顧身家性命

以為救敗計諸侯自守其國卿大夫自治其邑不可
即我以恃強然其所為豈得已哉其所尚者乃窮極
不堪計无他出也窮如獸窮則搏之窮人臣止宜引
罪自退往而不返以全臣道剛正之氣不可磨滅其
勢適長是有終也夫文王以百里侯國僻處岐周自
公劉以來積德行仁獨夫殘賊幾于毒害其身苟欲
阻兵自救豈曰不能乃甘束身美里聽生死榮辱于
昏主正不利即戎之謂也如云稱兵以清君側无乃

已甚乎

決行流也從水從夬夬有缺之義決水就缺處而去

象曰澤上于天夬君子以施祿及下居德則忌

川澤之氣蒸而向上以達于天必返而歸下以說萬物潤枯槁此夬之象也君子之居天位者觀九州之賦貢自下而上輸當與百僻鄉士共享天祿復自上施而及于下此澤天之明象人君之正分也若以謂

吾能富貴天下人居以為德則天下人即忌之矣居如居功之居德如思德之德君臣至情相倚一體共天位食天祿此常事爾所以同于父子比于天地義之至也苟徒以名物驅使天下而无至情至義行乎其間則犬馬草介顧不殆哉夫子于去國之臣而發言若此所以謹其離合之原也

己即忌憎惡也從心從己己之為言私也人有己无則忌之己不如人則忌之其憎惡皆從私起

初九壯于前趾往不勝為咎

在下之小臣非貴戚肺腑非喬木世家其君臣之分
諛輕其去就之決策亦易見吾道不行而事不可為
則納履而去壯者矯健之謂壯于前趾言去之疾速
有前而無卻也人臣不勝其任棄所職而往是負在
上之倚任雖未至于僨事然即此輕受輕委已足為
咎初蓋見幾明浚非此之類

賤力勝任也從力從腓腓兆也能勝其任與否先視

其力而胼胝見矣

象曰不勝而往咎也

初乃時不可為而去非力不勝而往者如不勝其任而始往豈得潔身遠害乎即此為咎

九二惕號莫夜句有戎勿恤夜句

為下卦之主乃藩屏之臣小心敬慎于號呼相應之時雖當莫夜凡人俱晏安而弛戒備二獨至此而猶惕厲懼患難或起于忽微也平居之兢業如是之以之

而當大事莊兵戎則神閒氣定可无憂慮矣惕號莫
夜與夕惕若相似讀象傳知其如此分句也。○象詞
不利即戎此有戎勿恤似不相合何也即戎有負固
不服犯上要君之意有戎謂彼加兵于我變起倉卒
而應之合宜

象曰有戎勿恤得中道也

有戎為國家之大事何能勿恤唯得中道以處之故
也中則合乎權宜不以晏安弛警不以事變徒憂養

之有素行之坦坦者也

九三壯于頄有凶君子夬夬獨行遇雨若濡有愠无咎
居下卦之上公侯大臣而接于天子者見時事之莫
可用其力遂奮然思去即置身于九達之頄急行而
不顧位為藩輔其向背豈可如此之輕易乎有凶之
道存焉矣君子處之當變而又變一決不忍絕至于
再決猶遲遲吾行不敢攜手隨衆寧獨行熒熒去之
不速至于遇雨若沾滯其身有所愠怒而不惜乃可

以无咎君子去就唯義所在潔身高蹈三非其位也
獨行謂初處下位進退自如二居中自守與上寥遠
可以不行四五貴戚欲行不得唯三介于上下之交
又與上應也

九首頌九達道也從九從首言頭頭是道也首字或
作百或作頁本一字則頌即首何疑哉自徐鉉繆音
頁為入聲遂生支離而義反不明矣解者以頌為顙
不如顙骨之頌其文從弁與九何涉頌達二字古人

通用東漢賈誼亦作賈逵頌頌二字則義相縣絕況
三在下卦之上未可象觀𣎵愠怒也從心從昱昱
者麗中熱氣醞釀之意怒藏于心如醞釀而成也
象曰君子交交終无咎也

君子于去就之際留連慎重忠厚之至然其終也亦
不及于咎何取乎悻悻哉

九四臀无膚其行次且牽羊悔亡聞言不信

未澤體而居天上承乘比應皆剛格格不可入居則

臀无膚難以安席行則次且而不能前進蓋貴戚大臣與社稷宗廟相為存亡坐視國家之顛隳痛楚无以自解欲轉而他適牽羊以為贄則庶可免于悔但于情于義有所不忍雖舉足而未敢投非緘口不爭非畏罪不諫奈彼之聞言而不信何

尻臀髀也從尸象曲足而坐之意從兀牀從几指

所坐之物也殿宇從之俗反從殿加肉繆罔之至

象曰其行次且位不當也聞言不信聰不明也

所處之位原无可用其果決故足次且而不前上為說主居卦之極逸樂之至而喪其五官之德聽已不聰豈能明吾所言乎

九五覓陸爻爻中行无咎

覓月官切

切近上陰澤上于天為雲為霧蒙蔽之象心雖知是非目不敢辨黑白如覓之處陸喪失其主則路迷動非食息起卧紛然錯亂忽決驟而遠去又驚逐而來歸覓陸夬爻之象也覓澤羊也羊目大而无瞳子所

見模糊唯視羣中一牡羊之狡黠者為首悉隨其行
止上為兌主羣羊之首也既昏極而不能自顧違及
其他乎且以无首之澤羊處于高陸或上或下或東
或西俱无定見然羊性好羣喪一首則又將擇一首
以為向導上六決而向下以成姤則乾進于上五為
之主此爻往來俱不失其中雖同行逐隊其中獨守
可以无咎五上相比不能決去上將反下五亦隨之
者也 四之羊山羊也欲其行則須挽故牽五之莧

澤羊也行不須牽隨逐而已故中行

首以覓澤羊也大尾細角俗呼綿羊者是也特著其
尾以別于山羊讀月官切 舊解作覓菜名讀胡練
切誤羊角為艸語多牽強

象曰中行无咎中未光也

隨人進退而得无咎睥睨焉其中未可云澈徹光
明者也澤本內明起為雲霧則无光矣

上六无號終有凶

居最危之地當必傾之時自謂足以陵踐羣剛不知
五陽皆去君臣道乖衆庶離心无所通其呼吸无可
施其號令矣窮陰孤獨終必有凶 人君視危為安
視孤立為衆輔賢人君子之去留漠然不相關切克
耳揜聰惡聞其過始末有不恃其盛滿以謂祿位在
身爵賞由我天下莫敢與抗及其終也无所作其威
福事已无可如何矣此皆祿不下施而居德者也
象曰无號之凶終不可長也

如日在天吾生有命俱以孤危之位為可長保及至
于終而始悟亦已晚矣



風下
天上

姤

人之所向去此則適彼情之所屬判決于上則聯合
于下陰陽消長合而離離而復合此姤之所以繼爻
也爻以窮陰在上其指為不祥之物相率而欲去之
姤以微陰下生競為親愛以迎其方張之勢乃相率
而欲就之澤天同位西北近而不相得君臣同朝齟

齧不入天位西北未位東南遙相對待男女異室綢繆相眷蓋君臣上下睽隔難合而易離男女恩私牽綴難離而易合故爻為浚而始為遇也天下之去故就新離家而為家者莫如女其卦天上風下春風披拂于天下萬物受之而生長如女遇男而成生育昏姻為嘉禮有燕饗之義故有豕有魚有瓜有角皆備物也取女所以主中饋爻凡三言包包庖厨也包犧氏取犧牲以供庖厨為祭祀燕饗之用故曰包犧亦

作包義古字不加偏旁往往互用是包即庖義即犧也魚爪非可包藏之物天下无理外之象不明斯義徒多支離回護而義愈晦矣

姤義取乎遇而六爻皆有不遇之象二不利賓是賓主不遇也三无膚次且是行旅不遇也四无魚是臣民不遇也五含章隕天是身不遇而以命誥遇也上雖言姤所姤者角遇猶之不遇也唯初繫于金柅則遇矣豈不以巽順在下易為遇合乎然又有羸豕之

誅正彖辭所謂勿用取女者也人生遇合聽之于天
枉尺直尋為之詭遇君子不為也

姤女壯勿用取女

陰陽消長天運旋轉在上之窮陰浚去不期其至而
忽遇之于下故為姤陰居上其位雖高其時垂盡為
退棄之象陰返其蹟雖微其理巽順其氣方生生有
日新月盛之象不可視為潛伏之一陰易而忽諸其
女直以壯矣巽為長女壯之謂也取女之道六禮既

備而後行邂逅相遇非取女之正也

姤偶也謂偶然相遇也從女從后古后後二字通用與人期約必前往以相赴後而得遇則偶然也男女配合前者為嫡後至為妾媵不過與君子相遇而已非匹敵也為一陰在下有女居于後之象

彖曰姤遇也柔遇剛也勿用取女不可與長也天地相遇品物咸章也剛遇中正天下大行也姤之時義大矣哉

姤之為言遇也剛性果決剛欲上進柔性沾滯柔欲
下行以柔忽與剛相遇則兩相膠固而柔能制剛矣
勿用取女者謂陰雖在下其始生之勢方漸進而陵
逼乎陽不可助之而與其盛長也自古女禍之烈必
先蠱惑于男男與之以盛長之權而後莫能制女非
自長也與之長也天高地卑其位隔絕苟非相遇則
閉塞而无施生高卑氣通陰陽間襍品物于此悉稟
其生生之化育相交錯而顯著剛无所遇困危于下

為潛為惕何能大行其志有陽剛之才德得遇中正之位以居之始可大行其道于天下遇合之偶然適逢其時雖庸衆亦可以表見不得其幾雖聖賢何所施其智力天地之大德曰生聖人之大寶曰位遇與不遇為之也然則始之時與之義不亦大矣哉

由遇逢也從龜從禺本動物无有定處行而相值乃偶然之事非期會所及也獸之往來必循故跡不踰分寸徐行而忽踐其故跡亦不相期約而值者

象曰天下有風姤后以施命誥四方

天无質風无形風行于天下无不鼓動而舒散其來也卒然而遇故名其卦為姤入君觀乎此象知天之所以號令萬物者唯風人君之所以號令臣民者唯命誥施之四方風行草靡无不信從雲雷雨霧霜雪嵐霾方偶遠近各有不同唯風之為物其在萬國九州雖有猛烈悠揚之或異而東西南北之去來未有不畫一者后之命誥輶轍窮荒咸為一體故謂之同

風命者明顯直截之令誥者丁寧反覆之辭也如尚書之八誥是也命略誥詳

誥告也從言從告為以言語告戒人也當即告字後人加言以分別之古文作𠄎𠄎數從言從肉從又是祭告鬼神之意正與誓義相通

初六繫于金柅貞吉有攸往見凶羸豕孚蹢躅

柅者收綫之器金柅以銅鑲為綫車之柄而旋轉之取其堅且滑也一陰居五陽之下其力最弱其質最

微不能自為興起必附于陽而後引之使出猶絲之
么忽必繫于柅而後蔓延縱橫也即古樂府所云女
蘿喬木之意夫陰之隨陽女之依男小人之附君子
乃事勢之必然亦義理之至正者烏有不吉但恐自
此而往其力漸壯女以依男者制男小人以依君子
者傾君子其為凶也已見于相親相倚之日矣獨不
見夫豕乎雖係羸之于杙似乎不敢躁動然其放突
之性豈因係羸而即改吾早已信其能踣躅矣蓋絲

之繫梘絲所欲也豕之就羸豕所不欲也徒知繫羸之同而不知親疎恩怨之分從此霄壤乎君子可不戒懼哉是女之制男小人之傾君子實男之罪君子之罪也如曰梘為止車之木未見既止之以木又繫車于止車之木也是繫字如何安頓況止車為輶為軌為輓未有為梘者羸豕與羸角羸餅同義

梘梘雙柄也從木從尼雙收絲之器尼者取人坐而運木之意蓋收絲之器如車輪輪則行以動尼則

坐而轉也或從尸從木作𠂔義尤易明𠂔𠂔𠂔
于上讀昌棘切下讀昌菊切左足舉步曰𠂔右足舉
步曰𠂔合之為行說文以小步步止釋之非也凡人
之行一足舉而向前則一足止左步右止右步左止
豈有步專屬左而止專屬右之理乎小篆改作諧聲
以𠂔𠂔𠂔躅易𠂔從足從啻以𠂔𠂔躅易于從足從蜀
躅取其足跡之踐地躅取其行之可見而煩難周折
甚矣

象曰繫于金柅柔道牽也

柔之為道不能獨往必有所牽引始能附之而行非止柔不進之謂大凡牽引皆挽之使前不屬止義

九二包有魚无咎不利賓

包即庖字包有魚與孟子庖有肥肉同義二與初近姤之最先有夫婦之象夫婦得魚烹飪于庖廚之內以自娛樂亦情理之常胡咎之有姤乃方遇之夫婦未親釜鬻之職豈能修燕享以速嘉賓則魚究為庖

廚所有之物甘美止以自奉于賓何所利乎如曰魚可包藏吾見亦罕矣

庖烹飪之所周禮庖人掌供禽獸畜辨其名物凡生死鮮薨之類從包者兼收並畜之意故即包而轉其聲後人加广以別之輾轉翻騰有加偏旁有不加偏旁經生不明斯義遂暗中摸索矣

象曰包有魚義不及賓也

魚以燕賓雖出自庖廚庖廚終不得而有之夫既據

為已有安得及賓之義乎

九三臀无膚其行次且厲无大咎

姤三從夬四來如損益之二五既未濟之三四其爻辭俱相髣髴三本風體上近乎天无所阻撓宜其行之疾速何以有无膚次且之象亦以初為木根其性下入三位上下之介秉承比應皆剛欲隨風而颺起則上礙于四欲隨木而深入則下窒于二故為進退不果之象處此位者两无可據危厲何待言哉然而

與其失之鹵莽一債而不可救藥寧失之因循猶可
為補過之地也天下之榮辱得喪皆因遇合而成低
回詳審自无不期之遇亦无意外之虞也故无大咎
象曰其行次且行未牽也

人之得行其道者必有所始遇始得牽引而上進三
欲行而上下皆剛未有牽之者故次且爾

九四包无魚起凶

二之魚徒有于包厨之内而賓不獲享四之意欲娛

賓而包廚之內實无魚焉安能起而成禮名實兩喪
故凶起如起而為壽起而更衣之起同蓋四處羣陽
之中獨與初應是一陰之來唯四能有之此人情物
理之常可以自信者也當姤之時不期而遇傾蓋如
故握手出肺肝固不可以尋常之交道為準則者也
故初四陰陽正應反所不取初二偶然邂逅即定平
生之交其時義使然四又烏能抗之也哉

起能立也從走從已已乃小兒幼弱之意小兒

將走必先能立起

象曰无魚之凶遠民也

近則遇遠則否民可近不可遠初之幼弱伏處于下
民象也四為大臣不能代君宣命以得民疾痛疴癢
不之覺誰與親就故食无魚而民散矣

九五以杞包瓜含章有隕自天

置魚于包裹之內其解既已牽強矣此又欲屈喬木
以包裹一瓜其牽強不已甚乎如云瓜之藤蔓藟附

于杞是以瓜包杞非以杞包瓜也聖人不為此影響
不切之象蓋曰用杞之美材為薪充庖廚而烹瓜云
爾此義與詩野有死麕白茅包之相似夫死麕乃遺
棄之穢物而用明潔之白茅以燔之而充庖不幾貴
賤失位也乎瓜乃蔬菜之凡品而用龍薤之杞以然
之而供庖不亦高卑易序也乎然五以君下民以賢
下愚如以美材烹常羹正施命誥于四方之元后也
其一身之所蘊蓄措諸禮樂事功者煥乎其有文章

苟未悉表著于天下則猶若含而未露于是自高而
及卑自上而及下使在天之文章墮而至于窮陋遐
域煢獨小民无不瞻彬彬郁郁之盛治此正品物咸
章天下大行之謂也是則姤之大者也

杞 杞木名從木從己好生谿澗亦名枸杞枸性糾
杞性直句有枝柯交結之義已有榦木直立之義一
種而稍有不同者瓜 瓜蒌也象藤蔓結實之形在
木為果在地為蒌 墮從高下也從阜從員員即

圓之省體置圓物于高阜之上轉而就下不必人力
矣

象曰九五含章中正也有隕自天志不舍命也

剛遇中正故有文明之盛治其德其位均相稱也為
人君志在蒼生豈能家至而戶曉之不過因命誥以
及民耳其自天之隕斷不能舍命誥而別為之術也
上九姤其角吝无咎

獸之百骸角最无情其處最高身脊未露而其形先

見相遇以此有牴牾而无款曲蹢躅落落獨行无與
人生如此孰與為歡乎故吝然而世路荆棘人心鬼
蜮恩之所在怨必歸之寇讐戈矛斷不施于行路而
施于親密視此始終難合者豈不脫然于恩怨之外
乎故无咎 寡交者必視已過高視天下之人无足
以當其意而人亦畏之角之象也

象曰姤其角上窮吝也

君子之于學也匹夫勝予自視无知君子之于世也

非斯人而誰與故能生生不息應變不窮使身世之
遭逢概以无情處之則高亢无所之窮極无所往自
取其吝也

史言君臣君臣之窮至于沒絕而極其去國之時俱
有悽愴眷戀之至情出諸无可如何者也妬言夫婦
夫婦當謹之于始慎而至于勿取聖人欲其遇合之
正夫本合者離而欲去壯趾惕號壯遠次且中行无
號其位之遠近處之難易若此本不相知者不期而

遇繫扼有魚次且无魚含章姤角其遇合因時非人力可為又若此去不欲其速合不欲其苟觀乎去就離合之際而君臣夫婦之道思過半矣



澤上萃

物既相遇而相合凡其同類與同氣者俱將趨而會聚于此矣蓋合久而聚多姤暫而萃久也故姤之後乃有萃也天下最易會聚莫之間隔者无如水水所會聚為滙為渚必在寬廣卑下之處始能容受衆流

停蓄而成汪洋浩渺之區然與水之本性則又異矣
水行而澤不行也水在地无不浸潤地得水以堅水
得地以流故為比比者舍已從人相得相親也來不
拒去不追聽天下之飛翔其治化疏濶所以建國親
侯而不疑澤在地无有滲漏澤為之湊泊以託于地
地為之隄防以固其澤故曰萃萃者聚衆人而合為
一體蓄積備具寧靜而固守之也藏垢納污易入難
出驅天下于途轍必當制度整肅所以除戎器戒不

虞而防其或變何也比以民還民萃則以我治民也
水皦皦澤歡虞也卦之兩陽居君相之位君子得時
衆陰望而趨赴之所聚既衆情文不一有號有笑有
握有引有侖之喧有嗟有咨有涕洟錯襟于其內為
君相者宜乎誠固結使人人樂利然後下順而上說
聖人又恐上焉者徒知臣民當順我當享其說故又
詞歡欣鼓舞少恐懼愁怨多而于兩陽則言其不當
位言其未光以見聚人應天命之難也

後儒多以四位近君兩剛並莅嫌于僭逼謂四近下卦三陰先萃于四更欲因四萃五此皆諂諛之見增益人君猜忌之心者也觀五之陽剛正位豈後世哀平靈獻可比君相當權元首股肱喜起何嫌何疑而必欲盡削其承疑輔弼亦為不善讀書矣

萃亨王假有廟利見大人亨利貞用大牲吉利有攸往會聚天下之人无有阻隔亨通之至也惟王者足以當之王者又不敢以萬國朝貢為吾躬之顯榮而推

原于祖功宗德使百職趨蹌咸肅雖于其廟而兩相
昭假者羣聚而无衰心王者雖不欲專務為盛大然
四海臣庶所以會歸者皆欲沐浴此大人之光華爾
則天下悉由大人而得亨豈非上下同出于正道乎
夫如是則其假廟可以備物成禮用大牲而獲吉夫
如是則其見大人可以因人和而集事蓋有往必利
也天與人歸王者受命之象

萃艸貌從艸從卒言艸生叢襍之狀江河流逝

之水艸不能生瀦澤之地其艸蕃茂卒有畢義謂艸
所畢集也卒亦有衆多義謂艸之種類不可計也假
假古頌切讀若格至也從人從叚叚者借也計雅切
鬼神幽明之道非有實蹟可據而天之于人祖考之
于子孫必借明以達幽借人以感鬼借有以兆无而
後其精氣可通故凡感格之事皆以假借而顯其誠
敬然其大者則始于尸假人以為鬼也廟廟敬先
祖貌也從尸從朝古朝廟二字同用後加广以別之

朝本朝夕之朝與早同義人君視朝日未出月未沒
勤于聽政之意子孫有事于祖考亦必夙興夜寐以
盡其恪恭如臣民之趨朝也广者以朝適廟在其東
方但見其側不見其正故不從山牲牲牛完全從
牛從生凡郊社禘祫必卜犧牲而用卜得吉矣則別
為畜飼之乃謂之牲言未殺也殺則毛血已去非完
全矣從牛舉其重也

象曰萃聚也順以說剛中而應故聚也王假有廟致孝

享也利見大人亨聚以正也用大牲吉利有攸往順天命也觀其所聚而天地萬物之情可見矣

萃之義云何猶之乎言聚也下順而上說人民服從王者和樂由其有剛中之德而所應亦中正故能使天下歸之咸聚而不去也王者以天下之力致孝于鬼神臣民歸附于大人實相聚以正道祭則受福事則有功神人共與豈人之智力可希望乎乃天命使然王者直順而不違爾夫受命而興其於穆之運不

可窺測但觀其人心之歸向而聚會者高厚靈蠢之情俱章章可覩矣孟子使主祭百神享使治事事治天下歸之如水就下正用牲利往澤地為萃之意

孝善事父母者從老省從子謂子在老人之下能曲承其意竭盡其力也

象曰澤上于地萃君子以除戎器戒不虞

羣流就濕而成澤澤固深且廣矣然歸乎地者即能溢出乎地上則萃可喜也亦可畏也君子觀其象知


臣民歸已者衆其情性參差將有凶頑不類萌蘖于中雖在治安不忘危亂故當戢干戈韜弓矢之時戎器皆已屏除常懼有意外之事非思慮所及防者蓋戒備其不虞為急務也

除殿陛也從阜從余阜指階級之高下余指堂下之旁舍以其不在堂室借為革除遷除言置之旁舍而別具陳設之物于堂于室也𠄎𠄎器皿也從四口象蓬豆鼎彝陳列形舊云從戢者非也從犬犬能

守古祭祀及常用之器其銘識不曰子孫世寶則曰
子孫永用器之從犬示後人以善守之意

初六有孚不終乃亂乃萃若號一握為笑勿恤往无咎
人之會聚當其初來歸也莫不有孚信相感以為趨
向故能不約而同是可必之于初者然從此以後其
事變方殷豈可即保其終乎蓋至蹟至禴本未可齊
今則聚矣正乃所以亂乃萃者也天下之廣兆民之
衆豈與此唱彼和相要約于一堂之上共為歡笑者

等哉言若匹夫之友則可呼號而聚握手笑語而无
他也然順說之時天命所在勿用憂恤往而從上自
得无咎 初處地下澤流就之有藏垢納污之象故
云亂澤趨下則有聲故云號云笑

 握搯持也從手從屋屋中之物取之甚易其藏
甚固手之搯持而不失墜亦猶是也

象曰乃亂乃萃其志亂也

形蹟固聚矣而其志皆不同則亂正生于萃吾志苟

治何畏乎紛紜

六二引吉无咎孚乃利用禴

彖傳剛中而應謂五之應二二得地之中位之正率
羣陰而歸于有位之大人相引其朋類為吉且无咎
也其孚誠之感格可以達于幽明不必備物盡禮即
用禴祭之薄鬼神亦歆享而來萃矣況于人之有形
有質者哉澤性自上而下萃二欲萃五必引之使上
也卽汲引之謂

禴篆闕古俱作禴禴夏祭也夏月牲牢易敗反為
褻慢勺其可用之物而薦之龠管樂笙簫之屬用音
樂以娛神寒暑无所改變鬼神无形所歆饗者唯音
與氣而已勺亦樂名也聖人知鬼神之情狀故祭祀
尚音與氣

象曰引吉无咎中未變也

居羣順之內而獨得中與衆共聚孚誠特固始終不
變

六三萃如嗟如无攸利往无咎小吝

在地之上與澤相承萃之為象莫切于此矣故為萃如處衆陰之內而獨无應雖依附于人未有甄別之者故為嗟如夫襟聚于衆人中彼以衆人畜我亦何所利然順以從時往而有歸可以无咎不能獨立獨行僅與世推移寧不小有所吝乎

象曰往无咎上巽也

四五兩陽得權于上天下往歸是在上者有以入人

之深聚者皆獲順命矣巽入也上巽謂上先感我而我往也

九四大吉无咎

君相同治得君之專臣民莫不望而歸萃乘時御世其才其德原足以相配故能下順上說蓋我道大而獲吉也九五剛中既非孱弱之主亦无猜忌之心故天下信之而无咎如伊尹相湯周公相武王君臣皆陽剛之聖人天下朝覲訟獄同來同理嫌疑何生

若伊尹相太甲周公相成王則雖順說而不能无咎
惟陽剛之君得陽剛之相是不世之際會也

象曰大吉无咎位不當也

毋以天下萃己而謂我才德當然以位言之實處多
懼之地為不當也

九五萃有位无咎匪孚元永貞悔亡

衆陰萃于二陽而居君位者五也以剛中之聖居天
下之大寶臣民聚而歸之何咎之有其孚信之及于

人者不必皆自一己之所出而長人之善永遠貞固而不失其不虞之悔于此盡亡惟大人公天下无所猜忌故雖萃于四者亦咸萃于我矣元乃人君之德永貞乃永保其君位猶言天祿永終也比與萃俱四海歸心之象比著于彖詞者即彖即五比惟知有君也萃著于五象者萃有君有相當之者在五也象曰萃有位志未光也

雖有其位苟无其德則志豈能光顯乎五德位俱兼

又得賢臣以佐之所以能順說而當天命言人君不可以位自侈輕人民之聚也

上六齋咨涕洟无咎

澤性就下得地形之卑廣者而會聚焉凡財用謀畫俱出于此人得資之而悅樂齋財用也任土之貢咨謀畫也智能之士涕洟哭泣之狀說樂之反也澤居于上將汎溢橫流人才賦稅不能聚矣故兌說變為涕洟然君相明良以順天命上六得其所歸仍可无

咎

賁齋持遺也從貝從齊齊指五穀之類貝指珍寶之類言持黍稷金玉以贈遺也𠄎咨謀事曰咨從口從次問不厭詳以口相訪次第而及也涕人涕鼻液也從水從夷讀他計切去聲夷有傷之義言傷于肺而鼻流液也涕洟俱澤出于首者澤在上之象象曰齋咨涕洟未安上也

澤本在下之物而居于上失其宜而不安勢必反而

向下以成升也

萃卦六爻皆无咎蓋以人才既聚用長以益短用有以濟无人人皆得以補過也



木下
地上

萃之所聚者衆千人為英萬人為傑英傑之士出于聚會之中流俗不能沈埋其才智將漸進而上升升所以繼萃也卦取象于地中生木木始萌茁于地下得土氣之熏蒸養以時日遂成干霄拂雲之物使培

之也不厚則植根不固稍有搖盪偃仆隨之必所入
愈深所出愈大故升之取義自微而著皆由漸積而
成米粟自粒穗積而至升已可記數從此以及斗釜
鍾庾及太倉莫不始于升也布帛自絲忽積而至八
十縷為升已可經綸從此以及尋丈及冠冕衣裳亦
莫不始于升也君子自小學以達于聖賢亦猶是也
自委吏乘田以登于治國平天下亦猶是也六爻之
升義各不同初之允升其升以氣二之用禴其升以

聲三之升虛邑其升以位由下卦而陟上卦之象四
之亨岐山柴望則禮隆已極王則人爵已極山則形
高已極升之无可復升者也五之升階有天下而不
與高而不危之象上之冥升不息則形位聲氣俱消
不知老之將至心與天通者也夫升本在上之名聖
人示以極降之象莫卑于地矣偏指地下之木是舍
其枝幹而專言其根也故求升者不于升必先于降
先降則順先升則逆也

升元亨用見大人勿恤南征吉

卦名為升而其所以升之象與義皆在于卑下凡民視之而不覺彼包含溫積之氣固已大亨而不可遏斯時之大人尚未得為萬物所快覩惟用見而後升之分量乃盡然斷无或阻者勿須憂恤其光顯之未至木向春夏則發榮滋長南為離火之位介乎木土之間坤土得之而融和巽木得之而蕃蔚順趨其時此天地人物之自然南征故吉也雖言其序次亦其

勢所必至也

斗升十龠也從斗從一謂得斗中之十一也說文
作𠂔亦從𠂔加一而斛量象形不可尋或謂象
機上絲縷形則得之借凡登上之用云自此而積也
正與卦義積小高大切合

象曰柔以時升巽而順剛中而應是以大亨用見大人
勿恤有慶也南征吉志行也

木在地之中方句萌初發柔之甚者時之未至則伏

藏而不出時既至矣則奮然而特升其升之道惟巽
入居下自能順行上達且內抱剛中之德有應于外
是以能无所遏抑而大亨也大人見用于世今已必
然可勿憂恤天下生民无不受其福慶也南征之吉
乘時御運使平生所懷之志得于天而修于人者俱
至此而盡見諸行事也 老子萬物草木之生也柔
脆其死也枯槁堅強者死之徒柔弱者生之徒強大
處下柔弱處上此正柔以時升之義

象曰地中生木升君子以順德積小以高大

木性上達然其所以生生者必在地中非入之深不
成其升之事君子知陵節逆行不可以居身躡等銳
進不可以為學當法地德之順積累夫纖小以養成
巽木為高為大之才苟欲越次而升是卓无根之木
于地上生意已絕何高大之足云 釋氏去其人倫
日用非順德當下領悟立躋聖域非積小以高大淺
識者徒畏其禍福有志者獨樂其精微元妙豈知地

中生木之義乎

初六允升大吉

升之初位實為木根岐而處下其所入者深于此則其高大也見于彼不必覩其枝幹華葉而已允信其可升矣君子學行俱成小試則小應大試則大應皆自操乎隱伏之時豈俟布諸經綸而始定哉此非一人之吉其為吉也大矣 晉升之義相近允有進之義晉允在三三地上與日近也升允在初初木根得

地氣厚也

象曰允升大吉上合志也

賢人升降乃世道治亂之基此出彼應上下志同不
特臣求君而君亦求臣也 初岐為木根則二三挺
為木榦下根欲入上榦欲出似乎不同而榦升全在
根固其志實相合也木下生根則上發葉時刻不爽
九二孚乃利用禴无咎

萃自上而流下六二又為柔質不能遽上而應五故

必引之使上然後孚誠相格而禮之隆殺始可勿論
矣升自下而達上九二又稟陽剛之氣其上而應五
也乃其時勢之固然孚誠感格通于鬼神竟可略其
儀文度數即用禴祭之薄而已利矣何咎之有 升
二為木幹其欲透地而出若有橐籥以吹噓萃二為
地中其容受澤處水土調和若有氣機以鼓盪故二
爻皆有用禴之象

象曰九二之孚有喜也

上下相孚將有利民之喜矣

九三升虛邑

四邑為邱邱謂之虛小國寡民之象也三位下卦之上其升已離乎地將自裔土弱侯而起天下歸之不繫吉凶者非常之事不可言吉南征志行不可言凶其西伯戡黎三分有二之時乎

屯山虛大邱也從屯從虍百家聚落不成都市僅擇高廣之地日中相會以有易无爾人散之後仍為鳥

獸之所遊息為其无市廛故也因其聚少散多借為
虛耗盈虛古有魑字以别于邱虛俗反不用專歸于
借又于本文加土作墟繆戾甚矣

象曰升虛邑无所疑也

德高位卑由漸而進天下信之故曰无所疑

六四王用亨于岐山吉无咎

昔升虛邑而不疑是人信之也今之亨于岐山則天
受之矣天與人歸吉且无咎王文王也文王未嘗為

天子故見于四而不見于五有形之升至山而莫加
无形之升至格天而莫加文王自此不進以服事殷
德彌盛而心愈小也

岐 岐周文王所封因岐山以名之也從山從支其
山如木一榦中分為兩支也因為國都又作邽
象曰王用亨于岐山順事也

諸侯祭封內之望非柴望之比亦順其事所當為爾
事如有事于郊廟之事苟非鬼而祭何能邀福

六五貞吉升階

天命靡常惟德是與能貞者即吉也山體高峻歷盡
崎嶇則反為平地殿陛之間東西兩階揖遜而升何
其坦易乎履高而不危讓天位而不居之象也阼階
居堂東南巽象賓階居堂西南坤象紂都在東阼階
也岐周在西賓階也天子以天下為家主阼階是主
天下也文王所升者賓階示終于臣位不為主也
階陞也從阜從皆由庭以升堂壘土為等級如

阜之高為人所皆行者也古者階陛通稱後世臣庶稱階惟朝廷得稱陛

象曰貞吉升階大得志也

化行南國終于事殷此文王之志也柔順而升至于此可謂大得其所志矣象傳南征志行階在堂之南南征即志行迨乎升則大得也

上六冥升利于不息之征

升階則堂由堂而入則為室為奧乃宴息之處昏夜

所居者故曰冥升明動晦休庶人手足之勤勞也大
人法天晝夜不息雖寤寐未嘗怠惰即衰老猶不廢
學升豈徒名位功業而已哉不息之貞大人即天矣
冥升不息猶書玄德升聞非事功可記者老子以
俗人昭昭我獨若昏俗人察察我獨悶悶當之又曰
雖有榮觀燕處超然皆冥升之意

象曰冥升在上消不富也

升之已極即是降之發端祿位名壽當其既往何事

尚可留連雖富有四海能不轉盼而盡消乎則知不
息不消者別有所在斷不在于升之上也

萃升二卦往來陰陽聚散升降之道也聚者未有不
散升者未有不降聚必趨卑卑不能散而以升為散
如澤聚于地升為雲雨而散于天下升必親高高則
危而易降故困隨之如地中之木既升將為斧斤丹
黃所及升之歲時須久降則倏忽焉爾萃之象詞俱
若幽隱升之象詞俱若光顯亦以趨卑親高故也又

似萃難而升易萃合衆人其情事不齊升惟獨往其
氣勢專一故也兩卦俱有取于祭享萃欲聚其散假
廟大牲用脩所以聚已散之神魂也升欲降者升用
脩享山所以升我之誠敬也聚散升降无間幽明其
至矣乎

周易象辭卷十三